

Generosissime Vir,
MAGNE KAAS,

Domine hæreditarie de Frostrup, Duchol-
measium Præses Regie, Domine non
uno nomine æstimande:

Causa sunt & publicæ & privatæ, quæ ut hoc pau-
carum paginarum opusculum nomini tuo nuncupem, non tam
suadent, quàm imperant. A publici boni causis ut ordiar: quanquam
in te jure justo & prolixè laudare, & operosè commendare possim, tum sin-
gularem in Deum pietatem, quâ aliis, ad exemplum usq; præluces: tum ra-
ram, quâ ordinis literati homines complecteris, benivolentiam; tum in causis negotiisq; ci-
vilibus, viro nobili dignam prudentiam: maximè tamen publicum præconium meretur
laudatissima, quâ excellis, justitiæ administratio. Tanti enim apud Te est id, quod in se
est justum, ut nec personæ eminentissimæ vel tantillum contra jus indulgeas: nec ullæ lar-
gitiones, quippè quas ut pestem quandam semper odisti, Te à recto tramite transversum
abripiant. Quæ virtus quanti bodiè facienda sit, qui ignorant; corruptos infelicis hujus
seculi mores minus noverunt. Privatæ verò causæ, quæ me movent, ut hoc opusculo
meam Tibi probem gratitudinem, & plures & majores sunt, quàm ut multis paginis, ne-
dum paucis periodis, comprehendere possint. Nam non modò cum Regius Hafniensis
arcis Præses esses, Mibi & Meis uberrimè benefecisti: sed etiam ex quo Ducholmen-
sibus regiâ auctoritate præsidere cœpisti, varia consuetæ benivolentiæ specimina e-
dixisti. Quo circa ne inter homines, extremè ingratos numerarer, volui tenui hoc opere
testari, quanti Te & tuas virtutes faciam: precatus ex animo Deum, ut Tibi, lectissimæ
tuæ conjugii ac generosis liberis, & multos & felices annos benignè concedat. Vale Vir
Generosissime & me more tuo amare perge,

Qui Generositati tuæ
addictissimus est

CASP. ERASM. BROCHMAND. D.